

楊襄毅公本兵疏議

楊襄毅公本兵疏議卷之五

覆巡撫雲南都御史游居敬請征叛夷阿堂疏
少保兼太子太保兵部尚書臣楊博等謹

題爲逆賊悖違勒撫屢次聚衆越境搶劫乞行毗連該
省會調重兵征勦以彰國法事職方清吏司案呈
奉本部送兵科抄出巡撫雲南等處地方兼贊理軍
務都察院右副都御史游居敬題奉

聖旨該部知道欽此欽遵抄出送司卷查先該四川雲南
東川曲靖軍民等府密孟羅雄等州土舍土官祿位
安九鼎者潛各奏稱苗裔阿堂等叛逆殺害等情節

該本部備咨雲貴四川各巡撫衙門會同查勘應否
動調官兵作何勦撫施行去後今該前因查呈到部
臣等看得東川逆賊阿堂本以漏網之屬敢肆滔天
之惡盜印謀官殺人劫寨姦囚主母王法之所必誅
荼毒生靈人情之所共憤名雖聽撫以緩征討之師
實肆劫奪以濟溪壑之欲雲南撫臣言之甚詳若不
早為計處履霜堅冰殊為可慮相應通行議擬合候
命下備行雲南四川貴州三省巡撫都御史即便會同嚴
督各該兵備守巡等道親詣東川適中地方速將阿
堂等叛逆事情依法勘處文書到日限兩月以稟具

實四奏如敢仍前狂逆川貴總督總兵官并各該巡撫官查照游居敬所議選調官兵刻期夾攻務將阿堂等元兇黨惡搜捕盡絕以安地方良善之民不得妄殺祿氏之後另行查議兵備守巡都司叅將守備等官若或自分彼此不聽節制及違誤進兵總督侍郎黃光昇亦要從重叅治應動軍餉犒銀等項徑自便益處給不相遙制本部一面移咨都察院轉行巡按雲南四川貴州各監察御史通候事寧之日備將勦撫獲功失事官員勘明具奏以憑覆請定奪嘉靖三十九年五月十七日題奉

聖旨是欽此

覆巡撫福建都御史劉燾議分將兵信地疏

題為定兵糧以圖久安長治事職方清吏司案呈奉本部送兵科抄出提督軍務兼巡撫福建地方都察院右僉都御史劉燾題奉

聖旨該部看議來說欽此欽遵抄出送司案呈到部臣等看議得邇來守臣不稽本處之尺籍動輒請兵不考本處之經費動輒請糧繁言複詞上貽

君父宵旰之懷棄實循名下失臣子勤瘁之憂今據福建巡撫都御史劉燾所論其言兵則有水兵有陸兵集

一省之兵不再徵調其言糧有民兵之糧有軍兵之糧措一省之糧不必加派其言戰則有海上之水戰有岸上之陸戰其言守則有海上岸上之守有城廓鄉村之守字字有據鑿鑿可行誠八閩保障之長策信一時經略之至計臣等反覆披閱深以地方得人爲慶相應通行議擬合候

命下將見在叅將謝恩改爲北路住劄福寧州侯熙改爲中路住劄興化府趙文奎改爲南路住劄漳州府查擬責任換勅行事仍將總督備倭改爲標下遊擊將軍推舉相應官二員請旨簡用合用

欽定四庫全書
卷三
三
臣等

勅書符驗旗牌照例請給備倭指揮張弼暫回原衛聽候
別用其餘設立營寨等項一切事宜悉如所奏從實
舉行嘉靖三十九年五月二十三日題奉

聖旨是欽此

覆都給事中王文炳等查革冒濫軍功疏

題為正事規清冒濫以重恩典以勵人心事職方清吏
司案呈奉本部送兵科抄出兵科都給事中王文炳
等題奉

聖旨兵部看了來說欽此抄出送司卷查先該遼東撫鎮
官侯汝諒等題為達賊節次入犯官軍奮勇迎敵斬

獲首級等事內稱潘陽中衛撫順千戶所寄住民人
陳文舉為首陳學為從陳文爵為首陳賢為從共斬
首二顆又該延綏撫鎮官董威等題為點虜節次侵
犯官軍奮勇拒堵斬獲首級等事內稱浙江金華府
東陽縣義勇官趙鶚斬首二顆俱經本部備咨都察
院轉行各該巡按御史查覈去後今該前因查呈到
部臣等看得兵科都給事中王文炳等題稱查得遼
東撫鎮官侯汝諒等所奏獲功首從俱係千百戶總
小旗等項內有陳文舉陳文爵係寄住民人延綏撫
鎮官董威等所奏獲功首從亦俱本處人員內有趙

鶚係浙江金華府義勇官俱屬黃緣詐冒功次乞要
逐一查革仍嚴行各邊清正夙弊各一節爲照

國家之制極嚴世祿武選之法最重首功蓋緣出入鋒
鏑之間死生在於呼吸以故特隆酬報之恩子孫得
以廕襲先該兵科具題本部議覆欲行巡按御史備
查無籍之徒大昭剗革之政仰蒙

聖皇在上俯賜俞允不意遼東延綏二鎮首犯其禁即如
陳文舉陳學陳文爵陳賢既係寄住踪跡委屬不明
義勇官趙鶚籍在浙江黃緣益復大著所據巡撫部
御史侯汝諒董威總兵官楊照李輔不知而輒爲之

奏是爲不明知而故爲之奏是謂不公若不亟行究問即今南倭北虜正在猖獗一時忠勇之心壞百年磨勵之典誠非細故相應通行議擬合候

命下將侯汝諒董威楊照李輔重加切責一面備行遼東陝西巡按御史即將陳文學陳文爵趙鶚等五名通提問罪前後所獲功次盡為查革差人解回原籍以爲欺罔者之戒本部通行各邊總督鎮巡等官今後務要上體

聖心下恤公議有功雖微賤必錄無功雖貴勢必削如敢容情徇私聽臣等與該科指實叅奏見在地方果有

妄冒之徒一體查明革發仍要開具姓名作速回奏
嘉靖三十九年五月二十七日題奉

聖旨是侯汝諒董威等姑各罰俸二箇月陳文舉等并趙
鶚革去功次著各該巡按御史通提問擬具奏欽此

覆甘肅撫鎮官胡汝霖等俘虜軍功陞賞疏

題爲達賊侵犯官軍奮勇屢捷斬獲首級奪獲達馬夷
器等事職方清吏司案呈奉本部送兵科抄出巡撫
甘肅等處地方都察院右僉都御史胡汝霖平羌將
軍鎮守甘肅總兵官都督僉事徐仁題俱奉

聖旨兵部知道欽此通抄送司案呈到部看得甘肅撫鎮

等官都御史胡汝霖等題稱節次斬獲強壯虜首一百二十一顆奪獲達馬夷器不等防守百戶井濟律當重治但賊衆兵寡情有可原及稱不敢有違近例互相稱引各一節為照甘肅一鎮斗絕羌胡之中其在九邊最為險遠近又加以俺荅之擾倏入倏出目中全無五郡所賴總督鎮巡諸臣協心調度將領等官極力驅逐先後斬獲首級總計一百二十餘顆大警旃裘之心少紓華夏之氣允可嘉尚但近奉

明旨法當行勘相應通行議擬合候

命下移咨都察院轉行甘肅巡按御史即將前項獲功人

員作速查勘明白陣亡有功將兵分別應陞應賞等第傷故人役照例優卹百戶并濟行提到官并失事匿報人員應參應問作速具奏定奪効用屬番聽撫鎮官動支庫貯茶斤米布牛酒徑自從重給賞以示激勸及照總督侍郎魏謙吉鎮守總兵官徐仁巡撫都御史胡汝霖適當地方凋弊之時力爲兵食經略之計屢戰屢捷其功非出於倖成多方多筭其心本竭乎忠赤雖拘於近例不敢互相稱引臣等虛心評騭自難輕泯合無將魏謙吉徐仁胡汝霖各陞俸級仍厚加賞賚嘉靖三十九年六月初六日題奉

聖旨是魏謙吉徐仁胡汝霖各陞俸一級還各賞銀二十兩紵絲二表裡欽此

覆寧夏撫鎮官霍冀等免選遊兵令奇兵入衛疏題爲邊鎮營伍空虛懇乞

聖明免選遊兵以安重鎮事職方清吏司案呈奉本部送兵科抄出巡撫寧夏等處地方都察院右僉都御史霍冀征西將軍鎮守寧夏總兵官趙應題俱奉

聖旨兵部知道欽此通抄送司卷查嘉靖三十八年四月內該總督陝西侍郎魏謙吉題稱甘州見報緊急聲息乞要行令寧夏鎮巡官先將副總兵吳徵人馬摘

發二千統赴甘州策應等因又該巡撫寧夏都御史
霍冀題要將入衛遊兵下班者十月掣放上班者二
月起程如係防冬者亦許於次年正二月酌量緩急
早為掣放等因節該本部覆奉

欽依通行欽遵外今該前因查呈到部看得寧夏撫鎮官
都御史霍冀等題稱本鎮兵少要將增選遊兵一枝
停免挑選調去莊涼本鎮奇兵盡數掣回責令副總
兵統領以後分為三班輪番入衛及稱下班遊兵不
許別鎮濫行調遣為照寧夏地方孤懸河外山後之
虜窺伺於西河套之虜住牧於東在各邊中最高衝

險且原額兵馬數本不多近又加以入衛之役益
削弱所據撫鎮官霍某等具題前因新兵既不增加
舊兵又得輪換一舉兩得相應通行依擬合候

命下移咨總督都御史郭乾查照所議事理將原調應援
莊涼副總兵吳徵奇兵盡數掣回該鎮休息不敷之
數仍於各營兵馬內轆足三千與原選遊兵二枝分
作三班輪流入衛以均勞逸如或甘肅聲息重大聽
軍門另議別兵調遣以後鄰鎮有警亦不許輒調此
兵大抵陝西三邊去京甚遠閩外之事全在總督相
度機宜本部難以遙制嘉靖三十九年六月初九日

題奉

聖旨是欽此

覆甘肅巡按御史王好問責成邊臣預防虜患疏
題爲聲息重大乞 勅邊臣早為防慮以弭虜患以保
孤鎮事職方清吏司案呈奉本部送兵科抄出巡按
陝西監察御史王好問題奉

聖旨該部知道欽此抄出送司卷查先該巡按陝西監察
御史甄敬題稱大賊侵犯莊浪等處地方乞要本部
速籌制禦嚴行防範等因該本部覆奉

欽依已經咨行陝西督撫等官侍郎魏謙言等嚴加防範

去後今該前因查呈到部看得巡按陝西監察御史
王紹問題稱套虜移住山後部落益繁俺酋或據西
海猖獗尤甚乞要速籌制禦嚴行總督鎮巡等官共
濟協心早爲議處一節爲照甘肅地方三面臨敵中
通一線之路山川隔遠自昔號為孤懸戎虜交馳于
今更切剝膚御史王好問目擊其患預為先事制人
之計憂深思遠其言有理相應速為議擬合候

奉本部馬上差人移咨總督都御史郭乾公同甘肅撫
鎮等官查照往歲巡按御史甄敬等條奏節該本部
覆議制禦機宜嚴督副叅遊守等官各將所部兵馬

分布通賊要路嚴加隄備遇有警急一面調兵截殺
一面星馳具奏仍傳報鄰近關鎮一體策應務要聲
勢聯絡不得自分彼此致誤事機合用器械糧餉等
項預爲處備毋致臨期匱乏如敢玩愒觀望聽總督
巡按官指實叅奏大抵河右之事先守而後議戰足
食而自足兵臣博巡撫之時固嘗開濬河渠以興屯
政脩築墩堡以圖收保以忠而勵壯勇以義而紉屈
番虜若小出則勒兵以挫其銳虜若大舉則堅壁以
老其師行之數年頗見成效今行巡撫都御史胡汝
霖遂一稽查廢墜者及時脩復停調者因事振舉不

爲一時之計而為百年之計不為一方之計而為王
郡之計方為萬全嘉靖三十九年六月十二日題奉
聖旨是欽此

覆薊遼總督尚書許論等一片石拒虜功賞疏
題為大虜分犯內地仰仗

天威官軍奮勇拒堵敵退保全畿輔重地事職方清吏司
案呈奉本部送兵科抄出總督薊遼保定等處軍務
兼理糧餉太子太保兵部尚書兼都察院左副都御
史許論整飭薊州等處邊備兼巡撫順天等府地方
都察院右僉都御史張珌題俱奉

聖旨兵部知道欽此欽遵通抄送司案呈到部看得總督
薊遼保定等處軍務尚書許論題稱虜賊把都兒辛
愛等自正月初為屬夷影克等勾引全營東徙覘知
我邊嚴密逼至一片石等關百計力攻帶傷而遁督
撫總副巡關兵備等官雖有效勞不敢擅敘及稱叅
將佟登遊擊胡堯勲提調谷承功原任守備牛相功
當首論遊擊周邦郭琥原任守備涂永貴楊維藩功
當次論王客千把總操夜等官楊大鵬等一十八員
亦當敘及出哨被殺夜不收劉良等八名被傷軍人
蘇澤等三名均為可憫中軍等官王臣等十員名分

別犒賞各一節爲照往時薊鎮雖有春警大率倏聚倏散今歲則自正月至於夏四月糾衆窺伺殆無虛日在東則把都兒專意聽信影克百計攻衝在西則黃台吉假以收搶紅花多方振撼幸賴

聖皇在上玄休默相二千里之守已保萬全一片石之戰足稱一捷所據總督尚書許論仰荷

君父委任之隆曲盡臣子靖共之義往來營擅而起處弗遑料理兵食而巨細畢舉巡撫都御史張玘總兵官張承勛永平兵備副使溫景葵同心決策動中機宜之會叅將佟登等四員周邦等四員楊大鵬等一十

八員王臣等十員名戮力拒堵咸成保障之功是雖
職任大小不同係于激勸相應通行議擬合候

命下將許論特加獎賞張玘張承勛厚加賞賚佟登胡堯
勲谷承功量加陞級卞相准贖軍罪溫景葵周邦郭
琥涂永貴楊維藩量加賞賚楊大鵬等一十八員王
臣等十員名俱聽總督軍門動支官銀從重犒賞被
殺夜不收劉良等被傷軍人蘇澤等移咨都察院轉
行巡按御史覈實冊報照例陞賞優恤嘉靖三十九
年六月十二日題奉

聖旨許論賞銀三十兩紵絲二表裡張玘等各賞銀二十

兩三表裡侯登等各陞一級牛相准贖溫景葵等各賞銀十兩楊大鵬等并王臣等總督軍門犒賞欽此

覆宣大總督都御史葛縉等報大同出塞獻捷疏題爲捷音事職方清吏司案呈奉本部送兵科抄出總督宣大山西等處地方軍務兼理糧餉都察院左副都御史葛縉巡撫大同地方贊理軍務都察院右副都御史李文進征西前將軍鎮守大同等處地方總兵官中軍都督府署都督僉事劉漢題同前事俱奉聖旨兵部看了來說欽此欽遵抄出送司隨該本司案呈本部具題臣等議得大同右衛孤懸絕塞實爲三鎮

門戶而豐州又在右衛之外山川環合水泉甘美
賊丘富向來據為巢穴連歲勾虜攻圍右衛一方之
人危如壘卵向使右衛失守西至寧鴈東至雲朔均
無安枕之期仰賴

聖明在上軫念邊陲繼理擒逆之諭至再至三至於逐虜
入餉建堡增墩更置將吏申明賞罰一切機宜悉由
宸斷於時醜虜驚避右衛保全然猶住牧豐州不時剽掠
乃今總督葛縉巡撫李文進會行總兵官劉漢簡集
驍果以六月十八日出邊直抵豐州深入虎穴當將
賊巢焚燬賊黨俘戮二十三日凱還入邊震龍驤

之心發舒華夏之氣誠為卓異先年總兵梁震雖常
出塞然一至玉林川僅五十里再至會寧灣亦僅百
里未有今日往返七百餘里者也玉林之戰一百二
級會寧之戰一百四級亦未有今日功至一百五十
者也臣等切惟豐州之捷本於右衛右衛之平裁自
聖心自我

成祖三犁虜穴以來二百年間窮追遠涉再見此舉寔我
皇上中興之成功也况逆犯王直浙江擒獲明正法典海
波一清近日虜酋數萬突至薊鎮總督許論督兵戰
守功收萬全適當

萬壽無疆之期北虜南倭屢建奇功寔皆

聖德協天

聖敬格帝九穹垂祐百神效靈所致臣等待

罪本兵遭逢盛事不勝欣慶伏望

皇上卜吉恭舉謝典以荅玄貺其中外效勞獲功人員容

臣等分別查議另行具奏以俟

聖明裁奪臣等無任惓惓懇祈之至等因奉

聖旨這效勞獲功人員你每分別定擬來說欽此欽遵抄

出送司查得

大明會典內一款一報捷官舍人等以擒斬虜賊多寡為
等第七十名顆以上賞衣服一套九十五名顆以上

賞鈔一千貫陞一級一百一十名顆以上賞衣服一套陞試所鎮撫欽此又查得總督軍門差指揮同知李春寶總兵衙門差總旗張保巡撫衙門差總旗劉原各報捷音通查案呈到部臣等議得宣大總督鎮巡等官都御史葛縉等題稱本年六月十八日官軍出邊直至豐州二十三日方始入邊生擒斬首一百五十名顆奪獲馬駝牛羊一百二十五匹隻夷器七百餘件枝當將賊巢焚燬一空仰贊

皇上帝力難名神功莫測祝虔有典殷禮肇稱及稱內閣元輔贊襄密勿早定經綸并將一時獲功人員逐

一敘及各一節爲照前項捷音宣威沙漠寔皆

皇上玄功中外諸臣原無狗馬之勞荷蒙

聖慈在上特賜甄錄天地浩蕩之恩均切感激臣等遵奉
明旨謹議得在外獲功如總督軍務左副都御史葛綽新

承

簡命早負壯猷指授方略而動中機宜督發將兵而爭相
感奮鎮守總兵官署都督僉事劉漢智稱多筭平居
料敵如神勇冠三軍臨陣先登若虎巡撫右副都御
史李文進志意深長才思縝密頻年經理抱卧新嘗
膽之忠一戰功成實指示發縱之略以上三臣功當

同論而劉漢尤爲稱首威遠叅將麻祿標下叅將王
孟其鎮川守備劉本經聽勘原任遊擊徐欽坐營守
備千把總補兒害葛奈黃國相潘忠等一十八員各
奮鷹揚之勇並當豕牙之兇部下俘馘雖云不一要
之同入虎穴當為一等內麻祿王孟其劉本經徐欽
補兒害葛奈率衆當先黃國相孤軍殿後其功尤偉
協守副總兵叅將守備等官趙哥等三十八員革任
叅遊守操等官李官等一十六員策應雖在中途馳
驅均出外微效死竭忠當為二等原任總兵官俞大
猷戶部管糧郎中魏學曾兵備守巡副使王之誥叅

議楊守愚僉事王彙征董邦政大同府知府劉衍祚
管糧通判李春芳陳文周或運謀設策而毫釐無遺
或儲餉詰戎而巨細畢舉功亦當論內俞大猷魏學
曾王之誥尤當優處遠征將士三千餘名則艱關轉
戰哨探通事高虎等則預得虜形內外書辦當該寫
本占卜人等章文煥賈天錫等則勞心文牒陣亡官
軍張戢等六員名則殞身草野原差右衛體勘指揮
張大用百戶謝麟與有首事之勞其功均不可泯生
擒賊首李自橋等四名背華從虜罪不容誅從賊李
玉兒等一十六名終屬賊黨被虜漢人劉永富等四

十七名情本可矜相應通行議擬合候

命卞將劉漢超格陞廕仍加賞資葛縉李文進同加陞賞
麻祿王孟夏劉本經補兒害葛柰黃國相重加陞賞
徐欽免其勘問并朱漢俱准復職仍附簿錄用張奉
卞實准其贖罪潘忠等一十八員各重加陞級趙岢
等三十八員各量加陞級李官等一十六員各加賞
資內聽勘為事充軍者准與紀錄仍查發軍門一體
立功俞大猷量復祖職魏學曾王之誥各陞俸級楊
守愚王彙征董邦政劉衍祚李春芳陳文周張大用
謝麟各量加賞資陣亡張戢等照例各襲陞二級仍

各給棺殮銀二十兩獲功首從并出塞官軍及通事
高虎等寫本占卜賈天錫等聽本部於太僕寺馬價
銀內動支一萬兩解赴軍門分別犒賞事完造冊奏
繳書吏章文煥等本部該吏周文易等免考免辦事
在吏部逆賊李自橋等處決安置軍家事在刑部各
令移咨徑自議奏報捷人員李春實張寶劉原照例
陞賞仍咨都察院轉行巡按御史將有功首從官軍
嚴加覈勘限一月以稟并無隱匿別項情弊通行
具奏及照在內效勞如大學士嚴嵩徐階李本夙夜
寅清入贊篤恭之化始終籌畫外成掃蕩之功內嚴

嵩忠誠茂著密勿尤多內直成國公朱希忠禮部尚
書吳山撰文吏部左侍郎郭朴禮部左侍郎茅瓚右
侍郎袁煒翰林院學士嚴訥李春芳董份外攘內安
均有翊贊之功亦應酌獎至於臣與職方司屬洎塵
未效徒切屏營但

恩威出自朝廷臣等不敢定擬通乞

聖裁嘉靖三十九年七月十六日題奉

聖旨這出邊擒斬數多功可加錄劉漢陞都督同知廕一
子本衛所千戶葛縉陞兵部右侍郎兼右僉都御史照
舊管事李文進廕一子入監還各賞銀三十兩紵絲二

表裏麻祿等各陞二級賞銀二十兩徐欽朱漢張奉等
依擬潘忠等各陞二級趙崙等各陞俸一級李官等各
賞銀十兩俞大猷准復祖職魏學曾等各陞俸一級楊
守愚等各賞銀五兩李自橋等各處決安置馬價銀准
給發其餘依議行楊博賞銀三十兩紵絲二表裏該司
官各銀五兩欽此

覆給事中周京振紀綱以肅軍政疏

題爲申明舊例陳愚見以隆聖治事職方清吏司案

呈奉本部送吏科抄出南京禮科給事中周京奏奉
聖旨該部知道欽此欽遵抄出送司案呈到部看得南京

禮科給事中周京條陳振紀綱以肅軍旅之政一事
臣等看得南京地方

祖宗設立內外守備叅贊等官文武並用謀斷相資誠為
萬年經久之計頃者一二臣工曠職廢事已蒙

皇上出自宸衷悉從更置惟魏國公徐鵬舉則獨見留用
蓋以其世守留都群情帖服至於尚書江東南行之
時又蒙

天語諄諄訓義教忠炳如日星此正諸臣誓心圖報之秋
所據給事中周京具題前因無非攸奠南本之意合
無備行內外守備叅贊等官自今伊始務要同寅協

恭形迹頓忘振紀持綱弛張有要曉以忠義外消驕
悍之習時其賞糧內足俯育之願平居則嚴加操練
不為苟且悅人之計臨警則早為督發務存敵愾死
長之心遲以歲月世變風移自臻成效各官如敢處
置乖方或彼此掣肘悉聽南京科道官從實糾奏嘉
靖三十九年八月二十三日題奉
聖旨依擬行欽此

覆蒞鎮閱視郎中土叔果分別公罪議處職守疏
題為遵照舊規

請明調遣以重防秋事職方清吏司案呈奉本部送兵科

抄出兵部職方清吏司署郎中事主事王叔果題奉
聖旨兵部看了來說欽此欽遵抄出送司卷查先該本部
職方清吏司署郎中徐善慶題該本部覆題奉

聖旨是方振柴良弼各降署級二級李珍等罰俸半年黃
演降俸一級馬芳等着總督軍門獎賞祝福曹勲准復
原級欽此又查為前事該本部題稱薊鎮閱視兵馬又
係差官之期查得本部職方清吏司署郎中事主事
王叔果在任堪以差委前去該鎮悉照上年舊例會
同巡撫都御史及公同各兵備官照區嚴加點閱事
完不必造冊止要徑自從實回奏等因題奉

聖旨是欽此俱經通行欽遵去後今該前因通查案呈到部看得署郎中王叔果題稱奉

勅前往薊鎮會同巡撫兵備照依區分躬親校閱總一鎮十區新舊主兵之數與郎中徐善慶上年造到冊籍大略相符具見督臣許論總兵官張承勛振勵之功及稱副總兵祝福雷龍叅將仇已魯聰遊擊胡鎮王倫分守宋蘭補練有功所當褒賞署叅將黃演坐營官柴良弼所當復其俸級叅將黃龍提調把總徐勲清駿吳從堯劉世武所當罷斥遊擊崔經周爭先白琮張勲吳銓所當更置內張勲吳銓新任或行戒飭

昌平提督雲冒似為冗員決宜裁革欲要談鎮督撫
諸臣嚴督各該將領著實訓練并與新舊主客未安
事宜從長計處各一節為照薊鎮之事大要以練主
兵為根本以調客兵為權宜先該本部題奉

欽此期以三年教練有成即今已經二年止稱軍容可觀
未見精練倘遇警急實難全恃所據總副叅遊守備
提調等官玩愒之罪本自難辭振勵之功原無可錄
若使槩為獎賞不無冒濫至於昌平提督內而拱衛
京師外為應援各鎮不為昌平一處而設但既有副
總兵又有提督同處一城委為冗員似當裁併及查

得副總兵祝福清謹鎮靜雖稱賢將威名資望尚在
提督雲冒之下係干重務相應通行議擬合候

命下將雲冒改充總兵官鎮守居庸昌平等處地方仍兼
提督邊兵總領黃花居庸鎮邊等區兵馬并入衛遊
擊兵馬無事則從宜修守有警則隨方策應仍聽總
督節制凡事與巡撫都御史會同計議而行合用

勅書符驗關防等項查照請給祝福遇有相應員缺即為
推用雷龍等六員姑免究治黃演柴良弼原降俸級
不准開復雷龍等四員各加降俸徐勲等四員各加
降級張勲吳齡各加罰治其鎮邊城郭家寨等處

三枝遊兵應否另議主兵脆弱應該振飭新兵驕縱
應該處置俱聽總督尚書許論會同巡撫都御史張
玘從長計處條列具奏以憑覆議明年五月本部仍
差郎中一員前去閱視若使再無成效併將總督鎮
巡等官通行叅究嘉靖三十九年八月二十八日題
奉

聖旨是薊鎮練兵屢有旨著實舉行今經三年兵未見堪
用顯是各官不行用心且姑記著明年閱視再無成效
該科查叅治罪雲冒准改總兵官鎮守居庸昌平等處
地方寫勅與他祝福并雷龍等黃演等依擬黃龍等降

楊士奇奏詞
奉一級徐勲等各降一級張勲等各罰俸兩箇月欽此
覆順天巡按御史鄭存仁等勘明河坊口拒虜功
賞䟽

題為大虜非時突犯重地仰仗

天威官軍奮勇血戰敵退以保萬全事職方清吏司案呈
奉本部送兵科抄出巡按直隸監察御史鄭存仁巡
按直隸監察御史彭繼業題俱奉

聖旨兵部知道欽此又該總督薊遼保定等處軍務兼理
糧餉太子太保兵部尚書兼都察院左副都御史許
論題為大虜糾衆非時突犯重地仰仗

天威官軍奮勇出壻血戰拒堵大遭挫衄退遁功收萬全
事與同整飭荊州等處邊備兼巡撫順天等府地方
都察院右僉都御史張玘鎮守荊州永平山海等處
地方總兵官中軍都督府都督同知張承勛題俱奉
聖旨兵部知道欽此欽遵通抄送司查得總督許論差承
差姜松巡撫張玘差百戶宋儒總兵官張承勛差百
戶季相各來報捷及查得

大明會典內一款一報捷官舍人等以擒斬虜賊多寡為
等第七十名顆以上賞衣服一套九十五名顆以上
賞鈔一千貫陞一級一百一十名顆以上賞衣服一

套陞試所鎮撫欽此又查得嘉靖三十三年本部議
准薊州保障之功各該人員所報捷音雖無首級數
目但督撫等官各照頭功陞賞似當與一百名顆以
上者同論等因通查案呈到部看得巡按直隸監察
御史鄭存仁巡關御史彭繼業各題稱查勘過本年
七月初一等日大舉達賊攻犯河坊口等處官軍奮
勇敢退各該邊臣相應甄錄各一節為照薊州一鎮
地當畿甸其功不在俘獲全在保障殊與各邊不同
而虜之劫制屬夷四時窺伺亦與各邊迥異即如今
歲三月之中則窺一片石七月之初則窺河間

欲乘我不意攻我不備仰賴

聖皇在上玄休默佑

天威震疊彼虜大遭挫衄相率北歸保障之功具有明徵
所據總督尚書許論蒙

思起川以來數月之間卧不貼席食不甘味一切戰守機
宜曲慮周思靡所不至總兵官張承勛巡撫都御史
張玘又能同心叶力悉聽軍門指授文武和調允為
一時之盛今次之捷事出萬全委為異常既經巡按
御史鄭存仁巡關御史彭繼業并將一時效勞人員
勘明前來臣等逐一叅詳俱已允當但查得獨石叅

將呂淵哨報的確功亦難泯相應通行議擬合候

命下將許論特加獎賞張承勛重加賞賚張玘同加賞賚
遊擊胡鎮重加陞級叅將李意遊擊王倫白允中高
汝泰署遊擊黃金各加陞級兵備副使張邦彥併加
賞賚叅將呂淵中軍官王臣寶淮量加賞賚指揮馬
承胤遇缺推用原任守備魏棟免其軍罪充為事官
立功旗牌千總等官亢大章等俱聽許論查照原奏
姓名動支官銀分別犒賞報捷人員姜松等照例陞
賞內外當該令典張邦義等咨行吏部徑自議處獲
功并陣亡人員哨夜官軍轉行巡按御史作速造冊

具奏本部仍動馬價銀五千兩解送許論處給賞延
綏寧夏入衛并主兵出口力戰等項官軍以慰其勞
嘉靖三十九年九月十二日題奉

聖旨各官出邊堵截效有勤勞許論賞銀三十兩紵絲二
表裏寫勅獎勵張承勛二十兩二表裏張此二十兩一
表裏胡鎮陞三級李音等各陞一級張邦彥銀十五兩
呂淵等各十兩其餘依擬欽此

覆宣大總督侍郎葛縉酌議應援山西疏

題為大舉虜賊擁衆深入關南懇乞早賜援兵以救災
傷地方事職方清吏司案呈奉本部送兵科抄出總

督宣大山西等處地方軍務兼理糧餉兵部右侍郎
兼都察院右僉都御史葛縉題奉

聖上日兵部知道欽此抄出送司案呈到部看得山西虜情
總督侍郎葛縉先將宣大人馬盡數督發前去應援
本官提兵又親至廣武站調度戰守已中機宜今若
不量地勢遠近將薊鎮入衛之兵又議調發不惟虛
勞且增費費况東虜打來孫等見有傳報欲犯冷口
等處切恐西援既不相及東守反致有失事體不便
止有保定兵馬與山西密邇似應相機處發合候
命下本部馬上差人齎文交與都御史董威總兵官孫勇

會度虜情果與本鎮無碍酌量發兵出關策應文書
到日如賊已退回不必輕動嘉靖三十九年九月二
十日題奉

聖旨是欽此

覆協理戎政尚書王邦瑞條陳營務疏

題為申明營務以尊

聖制以期實用事職方清吏司案呈奉本部送兵科抄出
協理京營戎政兵部尚書王邦瑞題奉

聖旨兵部看了來說欽此欽遵抄出送司案呈到部看得
協理京營戎政本部尚書王邦瑞所陳五事均為詰

本朝志卷之二十一 三十一
戎要務相應開立前件擬議上請定奪嘉靖三十九年九月二十二日題奉

聖旨依擬行欽此

一紀戎政以尊

聖制臣等竊惟國營兵制肇自

二祖盡善盡美景泰以後間多更置至我

皇上神武中興大修戎政始復國初三營之舊一代令
典委當編勒以垂永久合無勘酌所擬本部選委才
識精敏司屬官一員備考經制始末集成一帙刊刻
分布本營大小將領共爲遵守以後不許輕議紛更

一嚴清理以足軍伍查得南北直隸并十三省及廣
差御史一員清理軍伍係是舊例先該本部移咨都
察院查處該院因地方有事且在道御史不敷差用
以故題奉

欽依暫為停差似難再議合無遵照近奉

明旨仍免差官嚴行各該巡按御史督同布按二司清軍
道并各府清軍同知悉心清理務臻實效如仍前廢
閣聽本部從實查叅究治

一分正備以足原營大率謂 神樞 神機二營餘
下將官十員所統兵馬不足一枝之數若將五軍營

備兵通行揀選撥補選剩者仍發本營收充備兵委
為有益合無移文總協大臣會同巡視科道將五軍
營備兵再行揀選交與 神樞 神機二營餘下將
官十員每員各全管領三千員名餘剩之數仍發五
軍營收充備兵與先次選定將官三十員共兵三十
枝各要用心操練精勇者作為前鋒遇有緊急以次
聽征中間將官如有怯懦不堪容臣等另行議處
一募家丁以倡勇敢蓋緣京軍怯弱不足為恃欲借
家丁驍健為之鼓倡甚為有益合無依其所據移文
總協大臣會同巡視科道將在營各將官下家丁嚴

行挑選係遠方推用或籍雖腹裡曾任邊方者每員
准二十名每人月給米二石仍給犒賞銀五兩於太
僕寺馬價或本營籽粒銀內動支務要曾經戰陣之
人方許存留但係在營召募者通行革退至于三營
老弱軍士盡數查出面加沙汰就將戶丁替役仍嚴
禁各衛所官吏不許刁難索騙如違聽巡視科道指
實叅究一面備咨南京兵部轉行五府都督僉書每
員下不拘名數各許多募邊人以為家丁糧賞悉照
彼中事例

一惜戰馬以壯軍威大要營中欲給馬六千匹查得

太僕寺見馬僅四千匹且半係剗遼軍門奏借防秋之數即使盡數充發尚不敷用况營中之馬舊者不行愛養日見倒傷新者雖稱臚壯旋即廼隤本官根極弊源言之甚當臣等無容別議合無移文總協大臣會同巡視科道嚴督各該將領將見在馬匹用心喂養不許作踐極貧軍士無力養馬者亦許更替本部一面咨行戶部將久欠料草盡數補給以後支放草束務足斤數先於太僕寺未發去寄養馬內量廐一千匹查給營軍候來歲頭運二運馬到再為議給其椿朋銀兩本營與戶部曾否解寺本部各另移文

務查明的以脩實政

預料陝西大虜出邊疏

題為傳報大虜入境緊急聲息事職方清吏司案呈奉
本部送據巡按陝西監察御史李秋揭帖到部送司
案呈到部看得北虜種類雖繁其在九邊以黃河為
界河之西為延綏寧夏每秋入犯者乃吉囊之部落
河之東為山西宣大每秋入犯者乃俺荅黃台吉之
部落地方相去本為隔遠頃者河東之虜自大同突
入山西官兵隨在拒堵僅及數日盡皆北遁宣大總
督侍郎葛綰等奏報甚明今據陝西巡按御史李秋

所奏乃是河西之虜內稱侵犯米脂等處查係延綏
邊邑離京畿三千里又查入犯之期為九月十七等
日尚係深秋之時迄今已經一月醜虜之志止在搶
掠似難久住此時必已出邊但性同犬羊狡猾叵測
復寇之舉勢自難保除臣等馬上差人齎文交與陝
西三邊總督郭乾延綏巡撫孫慎速查前賊如尚未
退調集官兵大加勦殺以伸筆戔之威文書到日如
果先已退歸慎固封守務保萬全仍轉行御史李秋
查勘賊經地方有無失事獲功備將各官功罪作速
具奏嘉靖三十九年十月初八日題奉

聖旨是欽此

酌議 景王之國事宜疏

題為欽奉事武選等清吏司案呈奉本部送准禮部咨
嘉靖三十九年十月初五日該 內閣傳示

聖諭

祖宗大制景王府造成數年當令之國如何不舉行欽此
隨該臣等具題奉

聖旨是著查擬具儀來看欽此欽遵臣等為照

親王之國典禮隆重凡一應事宜必先期戒備今奉有
明旨合行各該衙門將府中應設文武官員內官內使護

衛旗校人役及儀仗祿米船隻等項俱遵照

祖制會典預先選擇造辦待有次第行欽天監擇日徑自
題請其告 廟辭 陵朝 見等項儀注臣等一面
查擬開坐上請通行各該衙門欽遵施行嘉靖三十
九年十月初六日少保兼太子太保本部尚書翰林
院學士吳山等題奉

聖旨是欽此欽遵咨部送司案呈到部看得

景王之國典禮委屬隆重既該禮部題奉

欽依備咨前來所有本部應行事宜臣等檢閱舊例逐一
參酌明白合就開坐上請嘉靖三十九年十月初九

日題奉

聖旨是欽此

一查得親王之國例該揀選誠實的當官二十七員改充儀衛司及群牧所典仗所官仍撥校尉六百名軍一千名背什物軍一百名馬一百匹隨侍應用
今該

景王之國合無查照前例於在京各衛所多餘帶俸并京營見操官內選取二十七員另行開奏除授其群牧所軍一千名背什物軍一百名於在京衛分處撥校尉六百名於錦衣衛選撥務要人人精壯編定總

小甲送用一面劄行太僕寺於順天府屬寄養馬內
調取一百匹送御馬監印烙給與背什物軍士凡領
騎坐俱屬本府長史司帶管差撥隨侍

一查得 淮王等王之國本部查照 韓王之國給
與雙馬單馬起船 符驗三道事例奏奉

宣宗皇帝聖旨且只與他單馬起船的符驗欽此續該

益王之國本部查照前例奏准給領去後今該

景王之國合無斟酌前例行移尚寶司轉行內府印綬

監關給雙馬單馬起船 符驗三道前去應用

一查得先該 淮府等府長史司說稱各

王殿下帶去多人討轎擡送通州上船無轎撥用於
順天府辦車裝送奏奉

宣宗皇帝聖旨是與他車欽此續該 益王等王之國本
部查照前例題准行移起撥裝送去後今該

景王之國合無斟酌前例本部行移順天府起撥車轎
相兼裝送本部仍委司屬官一員預先整點務要足
用其本府官員軍校查照先年題准事例官照合得
車數軍校每四人車一輛每車於順天府無碍銀內
支給二兩四錢令其自雇合用廩糧通計程途咨行
戶部總於京倉支給

一查得先該 淮王等王之國欽奉

宣宗皇帝聖旨各王之國合用船隻等項著侍郎王驥許廊去通州河下打點擺佈不要悞了欽此及查得 德王之國該太監許安傳奉

聖旨通州張家灣伺候船隻差長隨二員該管主事員外郎今便下去打點欽此今該

景王之國合無查照前例本部與工部先差司屬官各一員仍各請差堂上官一員內監官一員前去通州督同分守等官將見在河下聽差馬快船隻打點整理如有不敷照依先年事例將附近衛分順回糧船

及張家灣至德州一帶灣泊軍民船隻惟據前奉
濟應用其軍民船照依料數五百料者給米十石四
百料者八石二百料者七石二百料者六石一百料
者五石以作腳價仍計程給與口糧俱行戶部於通
州直沽等倉關支

一查得 親王之國合用軍民人夫例該在內行順
天府屬州縣并五軍都督府屬衛所及府軍等衛在
外行各該巡撫都御史轉行所屬整點聽用今該
景王之國合無查照前例通行前項各該衙門遵奉施
行不許違悞

一查得 親王之國例該拽船人夫 王并妃所坐
黃船每隻下水五十名上水八十名其餘裝載物件
船每隻上水二十五名下水十五名本府官員船上
水二十名軍校船上水十名下水俱五名今該
景王之國合無照例遵行

覆福建巡按御史徐仲楫請命督撫等官勦賊疏
題為再報地方賊情事職方清吏司案呈奉本部送兵
科抄出巡按福建監察御史徐仲楫題奉

聖旨兵部知道欽此抄出送司案呈到部看得巡按福建
監察御史徐仲楫具題前因大率謂福建地方海寇

山寇內外流毒將遍八閩欲要督撫大臣戮力蕩平
一節爲照前項賊徒廣兵初止三百後至沙縣等處
輒增數倍殘倭初僅七百延及安溪等處數踰四千
明係本省之人互相勾煽借寇爲資不止手足之疾
誠爲腹心之患委常及早勦平以靖地方合候

命下備咨總督尚書胡宗憲巡撫都御史劉燾嚴督守巡
兵備叅守府縣等官設法掃平中間果有脅從之人
聽其自首與免本罪查發寧家但係首惡務要擒置
法典不宜輕縱事寧之日有罪有功人員通聽巡按
御史徐仲楫從實回奏恭候

宸斷嘉靖三十九年十月十三日題奉

聖旨是欽此

覆南京兵部尚書江東等條議南本修戎八事疏
題為遵奉

明旨悉心叅理修戎務以奠邦本事職方清吏司案呈奉
本部送兵科抄出叅贊機務太子太保南京兵部尚
書江東等題奉

聖旨兵部看了來說欽此抄出送司案呈到部看得太子
少保南京兵部尚書江東等條陳八事均係南本脩
戎要務合就開立前件議擬上請定奉嘉靖三十九

年十月二十二日題奉

聖旨依擬行欽此

一釐宿弊以治軍旅看得兩京並建南京尤為根本
祖宗建置各營屯以宿兵寔居中制外之至計乃今玩愒
日久百弊叢生至於脫巾之變突然而作尤可駭異
委當急為振刷遵照舊制同寅協恭合無依其所擬
備咨南京兵部會同內外守備責令提督營衛等官
將各營殷富人丁并役占軍餘盡數查出填實行伍
仍要加意撫恤不許科剋殘暴各官如果修舉職業
旌薦擢用聞其貪婪者指名劾奏務期上下相安恩

威允濟

一立賞罰以作士氣看得南京營中操練往時悉為故事今當改絃易轍之時正惟信賞必罰之會委當急為修舉合無依其所擬備咨南京兵部准於賞功銀內酌量動支分發各營會同內外守備定立賞罰條格每遇操練日期查照今議從實行之以昭懲勸一分信地以便戍守看得兵家之事以地利為本必須預識于平時方可責成于臨事所據南京險要處所委當及早規畫合無依其所擬備行南京兵部會同守備選委知兵文武官員將各該地方逐一備將

偏歷應該張疑設伏用騎用步預為講求停當仍定
議信地無事則合營團練有警則分道按伏務臻實
效

一清行伍以紀軍實看得南京軍士替補復役既稱
姓名不一混淆難辨委當急為查理合無依其所擬
備咨南京兵部會同內外守備行令該營官員每遇
朔望各將逃亡事故軍士查照今議備造文冊送職
方司收貯具告替補復役等項先行驗軍主事揭查
無異方行該管衛所勘保該司檢對停當徑自查處
大約尺籍既明奸弊自息

一議馬匹以壯軍威看得衝鋒陷陣莫利于馬各營馬匹既稱尪羸不堪騎征委當急為查處合無依其所擬備咨南京兵部會同內外守備即將見在各營馬匹逐一揀驗但係不堪盡行易賣照依今議馬價添作一十五兩給發馬戶責令收買臚壯好馬印給精強軍士騎操不許別項差占以致倒損

一置火器以振兵聲看得火器之中惟鳥嘴銃最為利便既稱各營置造不多委當急為添置合無依其所擬備咨南京兵部會同內外守備即支軍器銀兩委官置造分發應用

一革冗役以恤民隱者得南京地方軍民正差之外
又有各項雜差殊為無名之征人情既稱不堪委當
急為查革合無依其所擬備咨南京兵部查照尚書
潘潢題准事理將在京五城地方上江二縣一切差
役悉行裁免仍會行各該衙門一體遵行如有踵習
夙弊者聽科道官指實糾奏其餘登簿稽考等項事
宜務要從實舉行

一寬場租以蘇民困看得草場租銀原有定額又經
侍郎萬鍾清查題有明例即今逐畝加增係干民瘼
委當急為釐正合無斟酌所擬咨行南京兵部轉行

各衛將前銀除三十八年九年已徵外其四十年以後仍照舊額徵收但係新增者盡行除免以廣厚下安宅之政

覆操江都御史等官喻時等捕盜安民疏

題為緝獲重大賊首事職方清吏司案呈奉本部送兵科抄出提督操江兼管巡江南京都察院右僉都御史喻時題前事提督軍務兼巡撫鳳陽等處地方都察院右僉都御史劉景韶題為拿獲賊首消弭禍本以安地方事巡按直隸監察御史陳志題為陳言地方賊情乞勅臣工亟圖內治以戒不虞事奉

聖旨兵部知道欽此又該總督浙直福建等處軍務兼巡撫浙江地方太子太保兵部尚書兼都察院右都御史胡宗憲題為拏獲賊首消弭禍本以安地方事奉聖旨兵部看議來說欽此通抄送司案呈到部看得總督浙直福建軍務尚書胡宗憲等具題前因大率言賊首汪燦等惑衆倡亂雖經首發拿問但此輩素稱無賴縱其仇扳恐致枉累及據供稱曾給假批招募山東河南太行等處奸漢欲要各該撫按衙門緝捕巡按御史陳志則稱所屬州縣節有盜賊之警倭患雖平內治尤急乞行督撫軍門沙汰隱匿罪名投首立

功贖畫等項人役及時張皇撫緝地方各一節為照
犯人汪燃等本以庸流投充贖畫適兵旅之解嚴幸
地方之有變乃敢詐作公移招誘徒黨明出狂妄之
言陰行要盟之約據稱偽捏山東等處招兵文移若
使不虛尤為悖戾係干地方相應通行議擬合候

命下移咨山東陝西河南各該巡撫都御史分投差人在
於所屬地方嚴加緝訪果有前項賁文募兵奸人即
便拿究及咨巡撫鳳陽都御史劉景韶查照御史陳
志所議將投充逃亡之徒悉行祛革瘡痍之民加意
撫綏流劫私鹽之盜多方緝捕以靖地方本部仍咨

都察院轉行南直隸巡按御史將汪然等通提到官
毋拘成案虛心研究如果証據明實依律問擬不許
聽其扳陷無辜以致枉濫一面行令各該兵備時巡
所屬制遏奸宄仍或曠職廢事本處巡按御史指名
叅究嘉靖三十九年十月二十五日題奉

聖旨是欽此

覆宣大總督撫按等官奏報功罪互興勘問疏

題為大虜入境犯關仰仗 天威官軍奮勇鏖戰克捷
斬獲首級奪獲達馬夷器頭畜事職方消吏司案呈
奉本部送兵科抄出總督宣大山西等處地方軍務

兼理糧餉兵部右侍郎兼都察院右僉都御史葛縉
題奉

聖旨兵部知道欽此又該巡撫大同右副都御史李文進
鎮守總兵官劉漢各題為大舉達賊糾衆入犯仰仗
天威官軍奮擊斬獲首級奪獲戰馬事提督鴈門等關兼
巡撫山西地方都察院右副都御史孟淮題為仰仗
皇威玄佑速退酋虜克成大捷事巡按山西監察御史樂
尚約題為虜寇深入乞 賜究治失事官員事俱奉
聖旨兵部知道欽此通抄送司又奉本部送該通政使司
連狀送據原任應天巡撫今充朔州衛軍曹邦輔告

為垂憐斬首乞賜辯明以圖補報事山西承宣布政使司整飭大同左衛等處兵備右叅議兼按察司僉事王景征揭帖為大虜攻圍城池萬分危急仰伏

天威設謀敵退保全數萬生靈事等因到部通送到司卷查先該總督宣大山西軍務侍郎蕭繹題為貪懦主將大弛戎旅假道追賊畏威遠遁乞 賜重加究治

以懲積弊以飭邊防事該本部議擬覆題奉

聖旨王懷邦革去職任著巡按御史提了從重問擬具奏欽此又該巡按直隸監察御史王汝正題為大虜入犯守邊將領堵截無謀懇乞

聖明究治以肅邊備事該本部議擬覆題奉

聖旨劉漢章去都督職銜仍與孫吳趙奇聽勘李坤等巡

按御史提問具奏欽此俱經通行欽遵外今該前因查

呈到部看得大同山西相為唇齒山西視大同為大

門虜入大門則當治大同之罪宣大諸臣中間戰守

有功者又當甄錄其功大同視山西為二門虜入山

西則當治山西之罪山西諸臣中間戰守有功者亦

難輕泯其功此兩鎮地形之大略功罪之斷案也今

據總督侍郎葛縉巡撫大同都御史李文進巡撫山

西都御史孟淮則極言斬捕首虜之多巡按山西御

史欒尚約巡按宣天御史王汝正則槩言地方傷殘之狀且葛縉欒尚約王汝正專言總兵官王懷邦劉漢等之罪欒尚約又併罪孟淮在孟淮則亟稱王懷邦之功功罪頗殊是非迥異折中持衡憑何為據臣等竊惟功疑固當惟重不應為無功之賞罪疑固當惟輕不應失有罪之刑必須就彼覈勘明的一以服邊臣之心一以肅邊方之紀方可議擬合候

命下滿咨都察院轉行御史欒尚約王汝正查照先今事理即將山西大同事務毋分彼此公同查勘應提問者徑自提問應散拘者散行拘問要見賊經地方有

無殺虜人畜攻毀城堡損傷官軍是否重大失事斬
獲首級果否真正強壯或勦奪壯夫之功何官運謀
設策何官衝鋒陷陣應該陞賞何官調度不前何官
臨陣退後應該治罪何官功重罪微應該准贖何官
罪重功微應該紀錄逐一叅酌停當有功有罪人員
造冊一併具奏嘉靖三十九年十月三十日題奉
聖旨是欽此

覆雲南總兵官沐朝弼請罷巡撫贊理軍務疏
題為姦貪撫臣因受土官賄賂擅動兵戈代報私讎激
變邊徼乞

究治以安地方事職方邊司案呈奉本部送六科抄
出鎮守雲南總兵官征南將軍黔國公沐朝弼奏奉
聖旨游居敬已有旨拿了這所奏贊理軍務等項事宜兵
部查議來說欽此欽遵抄出送司查得先該巡撫雲南
都御史游居敬題爲逆賊悖遠勘撫屢次聚衆越境
搶劫乞行毗連該省會調重兵征勦以彰

國法事該本部議行川貴總督及雲南川貴各巡撫都
御史并各該巡按御史速將阿堂等叛逆事情依法
勘處限兩月以裡具奏等因題奉

欽依通行欽遵外又爲急缺邊方巡撫官員事該吏部等

衙門會題內稱雲南地方號稱簡僻巡撫責任本為
易稱但今土夷構亂戕害守臣

天討所加事體重大巡撫責任似宜委重合無比照湖廣
貴州事例於巡撫上量加兼理軍務字樣以便行事
事寧照舊等因節奉

聖旨鮑象賢著以原職巡撫雲南地方兼贊理軍務寫勅
與他欽此今該前因查呈到部看得鎮守雲南總兵官
黔國公沐朝弼具奏前因大率謂巡撫游居敬貪功
生事擅調官軍蕩費錢糧乞要明正其罪及分別調
兵體統并勘處逆酋阿堂等各一節除游居敬奉

旨拿解無容再議外爲照雲南巡撫例該戶部請

勅後因元江之變吏部等衙門始題奉

欽依暫加贊理軍務事寧照舊既該總兵官沐朝弼具奏
前來查與原議相同相應酌處合候

命下本部移咨巡撫雲南都御史蔣宗魯會行總兵官沐
朝弼以後地方一應軍機遵行本爵

制勅務要彼此計議停當應徑行者會行所司應具奏者
會本具奏不許違拘偏執有悞大計其巡撫職任除
去贊理軍務咨行戶部另換

勅諭欽遵行事阿堂等叛逆事情仍行川貴雲南總督鎮

守撫按等官悉照先奉明旨作速勘處如限回奏
嘉靖三十九年十一月二十六日題奉

聖旨是欽此

考選錦衣衛南北鎮撫司等官黜退疏

題為考選軍政官員事武選清吏司案呈照得南北鎮
撫司并象房千戶所官不該自陳例該本部會同錦
衣衛堂上掌印正官逐一訪其平日履歷行檢如果
公論不協者開具實論奏即今正在考選乞為查處
等因案呈到部臣等從公會考得南北鎮撫司與同
馴象所各掌印僉書等官除尚堪供職者不議外如

南鎮撫司掌印指揮僉事張鏜年老目昏殊絕官常
之望縱妻雷子全失天性之恩僉書指揮同知戴仁
素履之咎大拂乎輿情衰邁之年久妨乎賢路張濂
孝道既虧官箴亦壞整日惟知私營經年不赴公座
指揮僉事劉卿歐詈父妾具見忘親之罪欺凌母弟
弗思鞠子之哀鄭承宗放歌縱飲而威儀已失挾妓
宣淫而廉耻盡喪張璽昔任東廠貪暴有聲今在南
司乖戾無狀以上六臣相應革任閑住帶俸者也但
係近侍人員臣等不敢定擬嘉靖三十九年十二月
十三日題奉

聖旨張鏜等俱革任閑住欽此

覆錦衣衛僉書官自陳分別去留疏

題為自陳不職乞 賜罷斥以公考察事武選清吏司
案呈奉本部送兵科抄出錦衣衛管衛事後軍都督
府右都督黃浦等奏俱奉

聖旨兵部知道欽此欽遵通抄送司案呈到部看得錦衣
衛堂上官體貌隆重必得精敏端方之人方稱任使
臣等虛心評品不敢不慎除右都督黃浦歷任尚淺
指揮使許瑒高鵬奉職無疵合當議留外如指揮使
張爵周京行檢雖修年齡已邁所管令其致仕者也

右都督麥祥譽望不足服人庸劣每致悞事指揮僉事郭朝廉性資貪戾大拂輿情疾病侵尋難以自振所當革任帶俸者也但均係近侍官員去留出自

朝廷嘉靖三十九年十二月十四日題奉

聖旨黃浦許瑒高鵬照舊供職張爵周京著致仕麥祥郭朝廉革任帶俸欽此

覆左軍都督等府管府事侯伯自陳分別去留疏題為自陳不職遵例乞恩辭免府任以裨

聖治事武選清吏司案呈奉本部送兵科抄出左軍都督府管府事寧陽侯陳維藩右軍都督府管府事永康

侯徐喬松中軍都督府管府事南寧伯毛邦器前軍
都督府管府事寧晉伯劉斌本府管府事兼理紅盔
將軍安鄉伯張鐸後軍都督府管府事豐城侯李儒
本府管府事宣城伯衛守正府軍前衛掌衛事後軍
都督府帶俸興安伯徐夢賜各奏俱奉

聖旨兵部知道欽此通抄送司案呈到部看得五軍都督
府僉書并府軍前衛掌衛官雖事務繁簡不同均為
重職臣等虛心評品不敢不慎除右府僉書永康侯
徐喬松中府僉書南寧伯毛邦器前府僉書安鄉伯
張鐸後府僉書豐城侯李儒宣城伯衛守正年力正

強幹濟亦稱俱應存留供職者也如管府軍前衛事
興安伯徐夢賜迷心酒色而百務廢弛肆意誅求而
群情怨詈左府僉書寧陽侯陳維藩前府僉書寧晉
伯劉斌舉止輕跳甚不雅於班行資性疎庸全未聞
乎兵政俱應革任閑住者也但勲戚大臣去留出自
朝廷嘉靖三十九年十二月十四日題奉

聖旨徐喬松毛邦器張鐸李儒衛守正照舊供職徐夢賜
陳維藩劉斌革任閑住欽此

覆廣東巡按御史潘季馴請命督臣亟勦賊寇疏
題為強賊四起執官越城大肆猖獗乞恩申明勦撫事

宜嚴勅提督重臣移鎮失事地方以安人心以救生靈事職方清吏司案呈奉本部送兵科抄出巡按廣東監察御史潘季馴題奉

聖旨兵部知道欽此欽遵抄出送司案呈到部看得巡按廣東御史潘季馴題稱廣東潮陽等處山賊數千執官攻城流劫海豐碣石歸善等處毒痛慘烈勢甚重大乞要切責督撫軍門親督官兵星馳各該地方剋期勦滅一節為照廣東地方連歲山賊劫掠為患乃今入城執官肆無忌憚人心為之動搖法紀因而蕩廢御史所言明白痛切軍門若使照常遙制永無寧

謚之期相應通行議擬合候

命下本部馬上差人齎文交與提督侍郎鄭綱總兵官平
江伯陳王謨文書到日作速親詣前項作患地方會
同南贛都御史楊伊志嚴督該道守巡叅備等官選
調將兵立限追勦務在盡絕中間若有被虜脇從投
降之人悉聽從宜招撫安插既不許因事姑息縱惡
長奸亦不得槩無分別混玉為石如敢仍前玩愒聽
彼處巡按御史從實叅究通候事寧之日將各起失
事獲功人員分別具奏以憑覆請定奪嘉靖三十九
年十二月十五日題奉

聖旨是欽此

覆科道官王鶴等拾遺安鄉伯張鐸等閑住

題為考選軍政官員事武選清吏司案呈奉本部送兵
科抄出兵科等科都給事中等官王鶴等題前事又
該貴州等道監察御史楊儲等題為遵

明旨公拾遺以肅軍政事俱奉

聖旨兵部知道欽此欽遵通抄送司案呈到部看得五府
僉書錦衣衛南鎮撫司及象房等官均為重職臣等
竊計人才難得以故考選之時止各去其太甚者數
人今科道官王鶴楊儲等又將安鄉伯張鐸指揮張

子中高鳳都督程規文章論列前來委與公議有死
難以留用合候

命下將張鐸張子中高鳳程規俱革任閑住員缺應補者
照例推補嘉靖三十九年十二月二十日題奉

聖旨是張鐸張子中高鳳程規俱革任閑住欽此

楊文公本兵疏議卷五終